

南漢
州地
雜事
理志
詩







南漢地理志

吳蘭修撰

編主五雲王

編初成集書叢

種一他其及志理地漢南

中華民國二十五年六月初版

盛壽

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

(本書校對者林懷民)

榮

一一二二上

五代時十國紀事之略。吳則有釣磯立談。南唐則有馬陸二書。吳越則有備史。楚則有新錄。蜀則有錦里耆舊傳。惟南漢胡賓王之劉氏興亡錄。佚而不傳。黃文裕修廣東通志時。其書尙存。志中所載南漢事。不見羣籍者。疑卽興亡錄也。國朝吳任臣十國春秋。擡拾甚富。所載故事。不注出於何書。讀者病之。吳石華博士枕經葑史。無所不通。仿前後漢紀之例。年經事緯。輯爲此書。各注書名。以矯其失。至於輿地沿革。考覈精詳。尤非任臣所能及矣。予謂著正史易。著霸史難。正史有史成之起居注。實錄在。據事直書而已。霸朝多僻處偏隅。又少人士。不設著作郎。不立起居注。著霸史者。勢必採之稗官野史。然小說家或傳聞異辭。或詭隨失實。非明決擇。嚴去取。必致變亂黑白。顛倒是非。就南漢而論。歐史世家之紀年。職方之地名。尙有舛誤。況不及歐陽氏者哉。是紀籟禾去節。不支不蔓。當與常璩。崔鴻並肩。陸游馬令之徒。不足道矣。

甘泉江藩跋。

南漢地理志

嘉應 吳蘭修 石華撰

興王府本廣州。乾亨元年改為興王府。司馬光資治通鑑。領縣十三。

常康。咸寧。乾亨元年析南海為常康、咸寧二縣。永豐重合二場。樂史太平寰宇記。蘭修按歐陽修五代史云。劉龔自云家本咸寧。恥為蠻夷主。永樂大典引

宋會要云。劉氏割據嶺表。建僑都於廣州。乃分南海縣地為常康、咸寧二縣。以為京邑。且就美名。是也。宋會要又云。開寶五年廢常康、咸寧二縣。依舊為南海。與寰宇記王存元豐九域志。李攸宋朝事實。歐陽忞輿地廣記。合宋史地理志。有常康而不及咸寧。馬端臨文

獻通考有咸寧而不及常康並誤。番禺。增城。四會。化蒙。宋志作蒙化誤。懷集。泮水。宋志。宋朝事實。輿地廣記。作泮水。九域志作泮子。並誤。東莞。

清遠。浚滙。輿地廣記作浚匯。吳任臣十國春秋作浚滙。並誤。新會。義寧。

韶州。領縣五。

曲江。

始興。

蘭修按宋志宋朝事實輿地廣記宋開寶四年始興方隸南雄州寰宇記云乾和四年割浚昌始興二縣置雄州誤也。

樂昌。

翁源。

仁化。

潮州。

蘭修按潮州至宋末廢。歐史職方考無潮州誤。領縣二。

海陽。

潮陽。

禎州。

蘭修按通考宋天禧四年以州名犯仁宗御名始改為惠州歐史職方考作惠州誤。

本循州舊理。乾亨元年移循州於雷鄉縣。於此置禎州。仍割循州

之歸善、博羅、海豐、河源、四縣以屬之。

寰宇記。蘭修按寰宇記於循州下又云劉鋹割據僞號乾亨元年分歸善、博羅、河源、海豐、四縣為禎州。劉鋹當作劉龔。乾亨當作乾亨。王象之輿地紀勝駁正是也。

領

縣四。

歸善。

博羅。

河源。

海豐。

循州。

蘭修按循州至宋末廢。歐史職方考無循州誤。

乾亨元年移治雷鄉縣。

輿地廣記。

領縣二。

龍川、舊雷鄉縣。乾亨六年改。

寰宇記。

興寧。乾亨時移於舊縣西六十里。地名長樂。

同上。蘭修按黃佐廣東通志發齊昌府在興寧縣

北五里洪塘坪。南漢劉鑰置。使其子鑰之。宋開寶四年廢。爲興寧。考宋代地志諸書。並無置齊昌府事。今不從。

端州領縣二。

高要。平輿。

英州。乾亨四年。析興王府。瀆陽縣置。

十國春秋。蘭修按。太平寰宇記云。乾和五年。置英州。而通鑑乾和三年。出王勣爲英州刺史。則非置於乾和五年明矣。歐史職方考云。劉襲置。不著何年。今從十國春秋。

領縣一。

瀆陽。

雄州。本始興郡瀆昌縣地。乾和四年。於此置雄州。

寰宇記。蘭修按。歐史職方考云。劉襲置。領縣一。

瀆昌。

蘭修按。輿地紀勝引圖經。宋避仁宗嫌名。始改瀆昌爲保昌。通考。南漢以保昌縣置雄州。十國春秋從之。誤。

敬州。蘭修按。宋會要。宋志。通考。避翼祖諱。稱恭州。非實改也。輿地廣記。開寶四年。改爲梅州。熙寧六年。始廢。歐史職方考無敬州。誤。

本潮州程鄉縣。乾和三年。升爲敬州。寰宇記。領縣一。

程鄉。

封州領縣二

關修按唐書地理志武德四年析封川置封興縣後省寰宇記宋志通考輿地紀勝並云封州領封川開建二縣與唐志合今從之郝玉麟廣東通志乾享初改封川爲封興并省開建入之誤也

封川 開建

康州領縣四

端溪 晉康 悅城 都城

恩州領縣三

恩平 杜陵 陽江

瀧州領縣四

關修按唐志貞觀十八年藥州廢省安遂永業以永寧安南二縣屬瀧州至德二載改安南爲鎮南天寶元年改永寧爲建水實領瀧水開陽鎮南建水四縣寰宇記瀧州原領縣四宋開寶六年廢省開陽鎮南建水三縣入瀧水屬康州

輿唐志合今從之舊唐書地理志分永寧建水爲二縣輿地廣記宋朝事實十國春秋俱有安遂誤也

瀧水 開陽 鎮南 建水

通考作
嶺南誤

勤州領縣二。

銅陵。富林。

新州領縣二。

新興。永順。

高州領縣三。

電白。良德。

保定。

蘭修按、通典、舊唐志、寰宇記、宋朝事實、通考、作保定。唐志、九域志、輿地廣記、輿地紀勝、作保寧。

潘州領縣三。

茂名。梁開平元年改爲越裳縣。薛居正五代史。乾亨七年十月復名。

十國春秋。蘭修按、王溥五代會要、後唐同光元年十月改越裳縣復爲茂明、即乾亨七年也。時地屬南漢、於

後唐無涉。十國春秋改正。是也。今從之。茂明當作茂名。屬近之誤。

潘水。十國春秋作潘川誤。

南巴。

羅州領縣三

蘭修按唐志天寶元年改石城爲廉江招義爲幹水大厯八年以南河屬順州羅州實領廉江吳川幹水零緣四縣。寰宇記九域志宋朝事實與地廣記與地紀勝引宋會要並云開寶五年省廉江幹水零緣三縣入吳川屬辨州與唐志合。然

與地廣記云南漢立常樂州兼置博電零緣鹽場三縣隸之諸書亦云開寶五年省常樂州以博電零緣鹽場三縣置石康縣屬廉州是南漢時有兩零緣縣也。按寰宇記零緣縣在羅州西南一百二十里以零緣水爲名方輿紀要羅州即今石城縣治常樂州在今合浦縣東北三十里是二州壤地相接南漢置常樂州時以羅州之零緣分隸耳非別置一零緣縣諸書兩見誤也今改正又寰宇記分石城廉江爲二縣通考仍有石城招義南河三縣十國春秋從之並誤。

廉江 吳川 幹水

辨州領縣二

蘭修按宋會要李燾長編宋志通考太平興國五年始改辨州爲化州歐史職方考有辨州復有化州誤也。又按唐志乾封二年割羅辨入禹州大厯八年割龍化入順州辨州止領石龍陵羅二縣今從之。寰宇記化州禹州俱有羅辨與

地廣記化州順州俱有龍化並誤。

石龍 陵羅

春州領縣三

陽春 流南

蘭修按唐志武德四年置流南縣後省。寰宇記云春州元領縣三陽春流南羅水開寶六年廢流南羅水二縣入陽春與地紀勝引宋會要同據此則南漢復置流南縣矣。

羅水

雷州 十國春秋 梁開平三年移治驚雷江源南漢復歸海康 寰宇記 蘭修按黃佐廣東通志開平四年遷白院村乾亨二年遷特侶塘 領縣三。

海康 遂溪 徐聞。

邕州 蘭修按五代會要天福七年改邕州為誠州避廟諱寰宇記晉天福七年改邕州為誠州避廟諱漢初復天福七年即漢光天元年邕州已屬南漢於晉無涉今不從 領縣七。

宣化 武緣 晉興 朗寧 思龍 唐志寰宇記作思籠 如和 宋志作如化 封陵 輿地廣記作封陵

澄州 蘭修按輿地紀勝云圖經以為唐末廢澄州非是當從會要是也歐史職方考無澄州誤 領縣四 蘭修按唐志澄州領縣四寰宇記宋開寶六年廢澄州併止戈賀水無虞入上林屬邕州與唐志合今從之十國春秋澄州止領上林一縣誤

上林 無虞 止戈 賀水。

貴州 蘭修按貴州至宋未廢歐史職方考無貴州誤 領縣四。

鬱平 蘭修按唐志貴州下作鬱林縣於鬱林州下作鬱平縣與通典不合王象之駁正是也說見鬱林州下 懷澤 義山 潮水。

鬱州 蘭修按宋朝事實輿地紀勝宋開寶五年始廢鬱州入橫州歐史職方考無鬱州誤李吉甫元和郡縣志作鬱州亦誤 領縣三。

永定

十國春秋作永令誤。

武羅

靈竹

十國春秋作靈川。誤。靈川屬桂州。

橫州領縣三

寧浦

從化

蘭修按唐志從化本名淳風。永貞元年改寰字記云。犯憲宗廟諱也。輿地紀勝云。開寶五年併樂山從化二縣入寧浦。與唐志合。通考作淳風。十國春秋從之。誤也。

樂山

賓州領縣三

嶺方

元和志宋志通考作嶺方。

瑯琊

保城

宋志作石城。輿地紀勝作寶城。並誤。

潯州領縣二

桂平

十國春秋作平桂誤。

皇化

蘭修按通典通考作宣化。舊唐志云。貞觀七年置潯州。領桂平皇化等縣。又云。宣化漢阿林縣。屬鬱林郡。隋置皇化縣。後廢。貞觀六年復置。云云。據此則宣字乃傳寫之譌耳。唐志元和志宋志寰宇記九域志與

地紀勝皆作皇化。十國春秋作宣化。誤也。宣化屬邕州。

容州領縣六

蘭修按唐志容州領縣六。宋志寰宇記九域志輿地廣記輿地紀勝引郡邑圖志並云。開寶五年廢容州之欣道涓龍陵城仍領普寧陸川北流三縣。與唐志合。今從之。十國春秋領縣四。無陸川欣道誤。

普寧。北流。陵城。涓龍。欣道。陸川。

牢州。蘭修按。宋朝事實。輿地廣記。輿地紀勝。引宋會要。開寶七年。始廢牢州入鬱林州。歐史職方考無牢州誤。領縣三。

定川。南流。宕川。通典。新舊唐志。九域志。宋志。宋朝事實。輿地紀勝。通考。俱作宕川。是也。寰宇記作巖川。輿地廣記作安川。十國春秋作岩川。並誤。

白州。領縣四。

博白。建寧。周羅。南昌。

欽州。領縣五。

欽江。保京。蘭修按。新舊唐志。至德三載。改安京為保京。宋志云。宋初復為安京。是也。輿地廣記謂唐改安京。今不從。

廉州。領縣四。

合浦。大寶。初析置媚川都。輿地紀勝。封山。蔡龍。大廉。

內亭。

遵化。

靈山。蘭修按。舊唐志作靈川。誤也。靈川屬桂州。

常樂州本合浦縣地南漢立常樂州

十國春秋云
乾亨元年

兼置博電、鹽場、二縣

輿地廣記
南修按輿地廣記原作置博
電、零綠、鹽場三縣今刪正說見羅州下

割

羅州零綠縣隸之領縣三

博電本合浦地與鹽場同置 鹽場 零綠

黨州領縣四

南修按唐志黨州領撫安、善勞、善文、寧仁、四縣平琴州領容山、懷義、福陽、古符、四縣建中二年平琴州廢皆屬黨州無省
某縣明文輿地廣記云唐勝平琴州入黨州後又省善文、寧仁、福陽、古符四縣據此可補唐志之闕又云宋開寶七年廢

黨州省撫安、善勞、容山、懷義、入南流縣屬鬱林州與養字記、九域志、宋志、宋朝事實、輿地紀勝、
同今從之歐史職方考無黨州通考黨州領善勞、撫安、善文、寧仁、四縣十國春秋從之並誤

撫安

善勞 九域志輿地紀
勝作善牢誤

容山 宋朝事實
作文山誤

懷義

繡州 南修按宋志輿地紀勝引宋會要開寶五年始廢繡州省常
林、阿林、羅纒三縣入普寧屬容州歐史職方考無繡州誤

領縣三

常林

十國春秋
作常州誤

阿林 羅纒

鬱林州領縣三

南修按唐志建中二年省鬱林州之石南入興業仍領鬱平、興業、興德、潭栗、四縣十國春秋有石南誤也又按潭栗
新舊唐志其不注石南而考云書鬱林州領縣五或說石南潭栗則潭栗在書家三書或說字記或說志宋志未

朝事實輿地廣記輿地紀勝並云開寶五年省鬱平與德二縣入興業而不及潭栗也今從之十國春秋有潭栗亦說

鬱林

輿地紀勝鬱林州鬱林縣下云本漢廣鬱縣地沈約宋志及元和郡縣志並云吳改廣鬱爲陰平縣晉改爲鬱平縣歷代因之然晉宋以下諸志止有鬱平而無陰平是改廣鬱爲鬱平也元和郡縣志又云隋開皇十年於此置鬱林縣是鬱林縣始置於

隋也故隋志於鬱林郡下始並列鬱林鬱平二縣通典云大唐於鬱林懷澤湖水義山四縣置貴州是鬱平縣隸貴州也又云大石南鬱林等五縣置鬱林州是鬱林縣隸鬱林州也國朝會要云開寶四年廢鬱林州鬱林縣興業縣又云開寶四年改貴州鬱平縣爲鬱林縣則是開寶四年既廢鬱林州之鬱林縣故移鬱林縣之名冠之於鬱平縣耳由是言之在漢則爲廣鬱在晉則爲鬱平在隋始分建鬱林縣與鬱平並置唐始以鬱平縣隸貴州以鬱林縣分屬鬱林州故二縣之名隸於二州至國朝開寶平嶺南廢鬱林州之鬱林縣入廣業縣而改貴州之鬱平縣爲鬱林縣而二縣之名始合爲一新唐書志却以鬱平縣隸鬱林州而以鬱林縣隸貴州與通典殊不相應蓋杜佑唐人也紀唐之縣名必不差謬而新唐書以本朝更易之縣名而定唐人之縣名始不得其實矣不可以不辨隨修按王象之此論甚晰故備載之

興業 興德

藤州領縣四

潭津 感義 義昌 寧風

賓州領縣四。

信義。懷德。潭峩。

特亮。

蘭修按。賓字記云。縣有特亮山。在河河水北。昔有白牛。夜出。光影照林。村人以牛光影為特亮。故名。舊唐志作特亮。宋朝事實與地廣記俱作亮。縣十國春秋作時亮。並誤。

義州。

蘭修按。九域志。長編。宋開寶四年。始改義州為南義州。歐史職方考無義州。誤也。

領縣三。

岑溪。永業。連城。

禺州領縣三。

蘭修按。唐志。大曆八年。以溫水屬順州。唐末。以陸川屬容州。賓字記。禺州有溫水。十國春秋有陸川。而無羅辨。並誤。又唐志。禺州領峩石。羅辨。扶萊。宕昌。四縣。而容州北流縣注云。武德四年。析置宕昌。貞觀後省。不應復有宕昌縣。九域志。宋志。

輿地廣記。輿地紀勝。引宋會要。並云。開寶五年。廢禺州。省峩石。扶萊。羅辨。入北流縣。不及宕昌。今從之。歐史職方考無禺州。誤。

峨石。羅辨。

扶萊。

蘭修按。唐志。扶萊縣。武德四年。置。以扶萊水得名。通典。舊唐志。通考。十國春秋。作扶桑。誤。

順州領縣四。

蘭修按。唐志。大曆八年。容管經略使王翊。析辨州。龍化。禺州。溫水。羅州。南河。白州。龍豪。置順州。九域志。宋志。輿地廣記。通考。並云。開寶五年。廢順州。省龍豪。溫水。龍化。南河。入陸川。屬容州。與唐志合。今從之。賓字記。順川。止領龍豪。南河。二縣。歐

史職方考無順州。並誤。

龍化 溫水 南河 龍豪

瓊州元領縣五南漢省曾口顏羅二縣。輿地廣記、通考、同。 爾修按、寰宇記云顏羅、唐時省、今不從。又按寰宇記、 瓊州元領縣五南漢省曾口顏羅二縣。輿地廣記、通考、並云、唐貞元七年省容瓊縣、十國春秋仍有容瓊縣、 領縣三。

瓊山 臨高 樂會

崖州領縣三。爾修按、唐志貞觀五年割崖州臨高入瓊州、通考、十國春秋、仍有臨高、誤也。又按舊唐志、崖州有舍城縣、宋志、宋朝事實、通考、並云、開寶五年廢崖州以舍城、澄邁、文昌入瓊州、與舊唐志合、今從之、新唐志謂舍城、開元後省、亦誤。

舍城 澄邁 文昌

儋州元領縣五南漢省富羅縣。輿地廣記、通考、同。 領縣四。

義倫 昌化 感恩 洛場。新舊唐志、輿地紀勝、皆作洛場、寰宇記、輿地廣記、通考、十國春秋、作洛陽、誤。

萬安州元領縣四南漢省富雲博遼二縣。輿地廣記、通考、同。 爾修按、寰宇記云唐末省、今不從。 領縣二。

萬安 陵水。十國春秋作陵水、誤。

振州元領縣五南漢省延德臨川落屯三縣

宋朝事實輿地廣記通考同。爾修按寰宇記仍領縣五。誤。又按長編開寶五年六月徙崖州於振州。遂廢振州。歐史職方考無振州亦誤。

領縣

二。

寧遠。吉陽。

思唐州領縣二。

爾修按唐志永隆二年析襲蒙象三州置思唐州領縣二。九域志輿地廣記並云宋開寶五年改州曰思明。六年州廢。省思和入武郎屬襲州。歐史職方考無思唐州十國春秋思唐州無縣。並誤。又按輿地廣記通考天福初改州曰

思化。漢初復天福元年即漢大有九年。時地屬南漢於晉無涉。今不從。

武郎。

思和。

爾修按本平原唐長慶二年改。寰宇記九域志仍作平原。誤。

融州五代屬楚乾和九年歸南漢領縣二。

融水。武陽。

郴州晉天福初避諱改為敦州。

輿地紀勝引寰宇記。爾修按今本寰宇記闕。

廢臨武平陽。

爾修按通考誤作高平。今改正。

二縣入桂陽監。又廢資興縣。

漢復爲郴州。通考乾和九年歸南漢。領縣五。

郴。晉天福初改爲敦化。漢初復。寰宇記

義章。

高亭。

通考十國春秋作南亭誤。

郴義。本義昌。後唐同光中避諱改。輿地廣記

藍山。

桂陽監。唐元和時置。晉廢平陽、臨武二縣地入之。

連州。五代屬楚。乾和九年歸南漢。領縣三。

桂陽。陽山。連山。

昭州。五代屬楚。乾和六年歸南漢。領縣三。

平樂。恭城。永平。

宣州。五代屬楚。乾和九年歸南漢。省崖山、東壘二縣。通考領縣二。

龍水。天河。

桂州五代屬楚乾和九年歸南漢領縣十一。

臨桂。理定。靈川。陽朔。荔浦。永寧。本豐水。梁時改。修仁。慕化。本純化。唐永貞元年改爲

慕化。避憲宗廟諱。梁開平元年改爲歸化。後唐同光初復爲慕化。寰宇記。關修按。新舊唐志俱作恭化。元和志。寰宇記。九域志。宋志。宋朝事實。輿地廣記。輿地

紀勝。並作慕化。據輿地紀勝引唐志原作慕化。今本唐志。古縣下注亦作慕化。可證恭字乃傳刻之譌也。通考云。唐恭化縣。後唐改慕化。輿地紀勝又按梁敬祖諱茂琳。慕茂聲近。故改歸化。當時避諱之體如此。五代會要謂梁改純化爲歸化。同光中復爲純化。十國春秋從之。

誤。永福。古。義寧。本靈川縣歸義鄉。晉開運元年置義寧縣。輿地紀勝引皇朝志。關修按。時有兩義寧縣。一屬廣州。唐開元二十三年。岡州再廢。以新會。

義寧。復隸廣州。是也。一屬桂州。晉開運元年馬氏所立。是也。九域志於廣州義寧云。開寶五年廢。入新會。六年復置。於桂州義寧云。開寶五年廢。入廣州新會。六年復置。宋志與地紀勝引宋會要。並同。按桂州義寧與廣州新會相去千有餘里。合而爲一。其誤甚矣。十國

春秋桂州無義寧縣。亦誤。

溇州。晉開運三年二月。楚馬希範請以桂州全義立溇州。五代史。關修按。九域志。溇州。乾和九年歸南漢。領縣一。領縣一。乾德元年廢。

州。以全義縣隸桂州。與薛史合。是也。歐史職方考無溥州。又按五代會要云。開運三年。升桂州全義縣爲溥州。改存義爲德昌縣。并割桂州臨川、廣明、義寧三縣隸之。按桂州臨川當作靈川。寰宇記。九域志。宋志。輿地廣記。輿地紀勝。通考。諸書無廣明縣。亦無靈川。義寧屬溥州之說。會要誤也。十國春秋云。割

桂州廣明、義寧二縣隸溥州。亦誤。

全義本屬桂州。晉開運三年立溥州。改爲德昌縣。後復名。輿地廣記。

賀州。五代屬楚。乾和六年歸南漢。領縣六。

臨賀。桂嶺。馮乘。封陽。富川。蕩山。

梧州。五代屬楚。乾和九年歸南漢。領縣三。

輿修按。唐志。光化三年。馬殷表以戎城孟陵屬桂州。而九域志。宋朝事實。輿地廣記。輿地紀勝。並云。宋開寶五年省梧州之戎城。孟陵入蒼梧。殆南漢復以二縣屬

與。梧州

蒼梧。十國春秋。戎城。孟陵。作者州誤。

蒙州。五代屬楚。乾和九年歸南漢。領縣三。

立山。

東區。宋志作連區誤。

正義。

嚴州五代屬楚。乾和九年歸南漢。領縣三。

蘭修按：新舊唐志領來賓、歸化、循德三縣。通考：宋開寶七年廢嚴州。以修德、歸化、屬來賓、隸象州。與新舊唐志合。今從之。寰宇記、九域志、宋志、宋朝事實、輿地廣記。

輿地紀勝皆不及循德誤。

來賓。

循德。通考作修德。

歸化。

富州。梁開平二年入楚。乾和九年歸南漢。領縣三。

龍平。

思勤。
馬江。

柳州五代屬楚。乾和九年歸南漢。領縣五。

蘭修按：唐志柳州領馬平、龍城、象、洛曹、洛容、五縣。九域志、宋志、輿地廣記、嘉祐四年始省象縣入洛容。宋朝事實、輿地紀勝、引宋會要淳化元年始以洛曹屬容州。

十國春秋柳州止領縣三。無象、洛曹二縣誤。

馬平。

龍城。

蘭修按：宋朝事實、輿地紀勝、宋景德三年始改龍城為柳城。十國春秋作柳城誤。

象。

洛曹。

蘭修按：唐志云本洛封。元和十三年更名洛曹。通考仍作洛封。誤也。諸書作洛曹。今從之。

洛容。

龔州。梁開平二年入楚。乾和九年歸南漢。領縣五。

蘭修按：新舊唐志，寧風屬藤州。通典、通考，龔州有寧風。十國春秋，藤州、龔州皆有寧風，並誤。輿地紀勝引宋會要，紹興七年始廢龔州，屬潯州。

歐史職方考，無龔州，亦誤。

平南。武林。宋志、宋朝事實、輿地廣記，作武陵。與隋建。大同。陽川。

象州。五代入楚。乾和九年歸南漢。領縣三。

陽壽。武仙。武化。蘭修按：輿地紀勝引宋會要云：開寶七年省武化縣。隸來賓。景祐元年復。又引廣西郡邑志云：熙寧四年省武化入陽壽。宋志熙寧七年廢武化入來賓。諸說不同。然爲宋代始省可知。輿地廣記謂武化五代時

省十國春秋從之。誤。

蘭修又按：十國春秋南漢有思州。領務川、寧彝、思印、思王、四縣。考思州唐屬黔中道。後入於番。宋徽宗時，番長內附。復置思州。即今貴州思南府地。與南漢絕不相涉。茲刪正。又交州雖已內附。羈縻而已。不能實有其地也。併刪之。右志共州六十二。縣二百一十四。縣數與長編、宋史本紀及地理志合。惟彼云六十州不相附耳。

南漢地理志

譚瑩玉生覆校

右南漢地理志一卷。國朝嘉應吳蘭修石華撰。按自註云。共州六十二縣。二百十四縣。數與長編。宋史本紀。及地理志合。惟彼云六十州。不相附耳。考南漢高祖之興。至後主之敗。凡五十五年。中宗乾和九年。始盡有嶺南之地。大有十二年。尙書左僕射黃損。稱陛下之國。東抵閩。越。西逮荆。楚。北阻彭蠡之波。南負滄溟之險。蓋舉五嶺而有之。用武之國也。亦鋪張揚厲之詞耳。高祖亦嘗云。吾子孫不肖。後世如鼠入牛角。勢當漸小爾。而郡縣併析。幾於月異。而歲不同。且於境內置五嶽。呼唐天子爲洛州刺史。三城之地。半爲離宮苑囿。民之得以棲止者無多地也。長編云。後主至公安。邸吏龐師進迎謁。學士黃德昭侍後主。後因問師進何人。德昭曰。本國人也。後主曰。何爲在此。德昭曰。高皇帝居藩日。歲貢大朝。輜重皆歷荊州。乃令師進置邸於此。造車乘以給餽運耳。後主嘆曰。我在位十四年。未嘗聞此言。今日始知祖宗山河及大朝境土也。黃通志陸光圖列傳註。光圖有故吏龐姓者。嘗奏事見銀。銀識之。銀降宋。過騎田嶺。龐來迎。銀驚

曰爾亦在此耶。對曰大王之國邊境至此而極。非有萬里之遠也。鑑初以彬爲極邊。必在窮荒之北。故使光圖居之爾。宋謝翱作邱吏見故主曲嗟乎。僞劉之淫侈昏庸至此。獲保此疆宇至五十五年而後亡者。幸也。道光庚戌末伏後南海伍崇曜謹跋。



瓊州雜事詩

程秉創撰

本館據靈鷲閣叢
書本排印初編各
叢書僅有此本

續谿程蒲孫孝廉經術辭章罔不兼綜尤留心時事議論皆有根據不苟爲鑿空之談余曩使江右聞趙
搗叔董覺軒張公束諸大令皆樂與之游時江右方修省志君與其事也客歲春於同年生顧隲民觀察
許得讀君感事詩蒼涼沈鬱寄託遙深所詣浩博無涯涘相與歎賞者久之比奉命視學廣東邀君偕行
抵粵試東江舟中望羅浮諸山時近中秋月白風清輒有唱和或桑日夜疊韻不已今渡海來瓊州瓊屬
歲科試卷逾三萬几案如山積於時溽暑鬱蒸終日揮汗成雨君校閱之暇獨從容與余談海南故事不
三日成詩百首於瓊之山川形勝疆域沿革自秦漢至今日吏治民習之源流防海治黎之方略興賢勸
學之權輿忠孝節義之可泣可歌釋老神怪之杳冥不可測金石文字之緣起禽魚果木之瓌麗而瑋奇
莫不元元本本考訂精審往往言在於此而意託於彼取證於古昔而寓懷於今茲蓋深有會於詩人比
興之義所以爲一世之人心風俗計者至深遠也豈徒流連光景侈語網羅云爾哉昔坡公居海外詠歌
自娛至今瓊事流傳賴公詩以不朽今君甄選故實上下古今衡之玉局彌爲其難余誦而慕之亟爲刊
行以廣瓊士聞見之資并備異日藝文之采此一編也詩焉而志乘之體具矣至其思筆超雋情韻不匱
近人惟龔璣人已亥雜詩有此意境質之世之善君詩者以爲何如光緒丁亥夏五月錢塘汪鳴鑾

予自三十歲後不恆爲詩。丙戌夏從汪帥亭學使廣東。星飯水宿。積以爲常。涂長心曠。乃復操翰。越明年丁亥。渡海至瓊州。瓊於版圖際極南海。內俚外瀛。襟臺帶廈。自儋而西。近達交趾。山川雄奇。民物殷賑。昔號瘴域。今焉漸舒。遭時隆平。儲與坐嘯。固晏然跨海之雄都也。若乃勢有所極。鬲并薦轅。蠻觸橫戈。蠶食遠邇。扼吭俯險。藥惰擊歸。佻然崇墉。大邦維翰。樓船橫海之績。又未之或先焉。襄校餘閒。輒舉所見。以咨學使。學使曰。是固有之。然瓊僻處海上。唐宋以來。遷謫之士。大都以其文章。據其志意。罕有專著一編。爲是邦重者。不有蒼萃。亦弗彰也。於是稽圖考文。甄錄簡要。用七言今體。爲瓊州雜事詩百首。以副學使之意。詞旨庸下。慚非雅音。至於比物連類。惛然動懷。或有往復低回。長言而咏歎者。後之君子。不識將有取於斯乎。光緒十有三年夏五月。續谿程秉釗記。

瓊州雜事詩

續略程秉鈞

儋珠名始漢元封。

漢書賈捐之傳武帝元封元年置儋耳珠崖二郡。

象郡曾看列附庸。

一統志以今雷州府爲秦象郡瓊州當爲其屬地。

六數分明徵水德。嬴秦遺

俗至今從。

府志海南自秦并天下始爲南越。外境通於中國。秦以水德王。其數用六。今瓊人用錢猶以六數。如以六文爲一錢。六十文爲一兩。六百文爲一貫。及田禾以六把爲半擔。十二把爲一擔。猶秦俗也。

窮兵極武漫相嗤。鞭撻方能御四夷。一罷珠崖成底事。平生不信賈捐之。

漢元帝初元三年用賈捐之議罷珠崖郡。至建武十九年始復立珠崖縣。蓋淪

於異域者

百數十年

置郡休論始計差。國家之敗繫官邪。但除循吏扶凋瘵。中外何妨共一家。

賈捐之傳珠崖民自以阻絕數犯吏禁。吏亦酷之。率數年一反。殺吏。漢輒發兵

擊定之。自初爲郡。至昭帝始元元年二十餘年間。凡六反叛。故捐之議棄之。不知此實吏之不率不虔。未可爲珠崖咎也。

衛國行師振槁如。八州歸壻奉車書。

唐高祖武德五年行軍總管李靖度嶺至桂州遣人分道招撫於是大首領隋漢陽太守馮盎以南粵之地來降析其地爲高羅春日嵐儋林振八州。

乾封都

督眞無賴奇甸沈蕪百載餘。

乾封二年洞獠反都督李逸馭失所瓊州遂陷閱一百二十四年至德宗貞元五年始復克之見嶺南節度使李復收復瓊州表奇甸者明太祖敕稱瓊州爲南溟奇甸也。

金石難求宋以前探奇誰向海南鑛。卻餘數字貞元石。拋落荒巖不計年。

粵東金石略瓊山縣東潭都石巖下有平石深及丈左刻云貞元二年

○八月丁卯僧○○○○鑿爲記○○○○光法名無我十字以下不可辨右刻熙寧甲寅秋九月中休俞瑛率王憲自梁紋同游男
○○書十六字蓋北宋人題名也瓊之石刻此爲最古若府縣志所云唐馮公墓碑李吉甫撰文者今已不可見無由定其真偽矣

大中初政快恩讎王氣中原日漸收。若祇尋常悲謫宦。千秋何止李崖州。

實退錄載李德裕在珠崖與表弟某侍郎書極凄惻然德裕之貶實唐室興衰

所繫不止如宋趙忠簡諸人也

遷陵立主事匆匆。

丁謂貶崖州後上表乞遷云雖遷陵之距大實立主之功多

一代權奸語似忠。聞說當年工知數。奈何欲殺寇萊公。

宋人說部中每

言丁晉公之才

阿婆風雅解行歌。黎許朝朝載酒過。

東坡在瓊州有黎許二秀才相從問字太守張中爲築載酒堂

自有端明蘇學士。海南人物讀書多。

黎母山高上切雲。鶉居數飲日紛紛。如何納垢藏污易。太古遺風漸不聞。

黎居五指山椎骨成風初不爲患自奸民貿易往來勾結濡染漢習樸俗浸瀆

其後遂爲民害

畏威何似感恩多。萬古馨香兩伏波。誰與披榛通五指。衣冠重覩漢山河。

自明永樂以來官吏失馭致梁所置之崖州唐所置之洛揚落屯二縣地均沒

於黎

徧撫羣黎布義聲。承恩三世篤忠貞。千秋巾幗誰堪例。石砭英雄女總兵。

宋紹興間瓊山民許益爲亂黎人王日存母黃氏撫諭諸峒皆無敢從亂者詔

封黃氏宜人。以爲三十六峒都統領。酒熙八年黃氏卒。女王氏襲職。嘉定九年王氏卒。女吳氏襲。凡三世效忠。更在石砭土司秦良玉之前矣。

撫字還須吏奉公。誰將禮樂化顛蒙。至今尙感劉通守。能易侏僂慕古風。

黎之治亂視官貪廉。故宋明諸詔皆以布恩信戒賸擾爲官。廣東通志言慶元

初通判劉漢捐幣修學。延師訓課。以道義激動生徒。黎寮感之。亦遣子就學。踵至者十餘人。衣冠被服如制。此其效之最著者。

卻特兵威振古今。盡空庭穴化鴉音。劇憐善後少良策。萌孽還將柯斧尋。

卻特元姓也。亦曰博爾濟吉特氏。世祖至元二十一年都元帥朱斌等深入五

指。盡平黎巢。置屯田府。立定安會同二縣。萬全一寨。其功爲自古所未有。惜僅以控制付之土人。未嘗經久之策。數年後仍復騷亂。

木棉花種滿三吳。彈織由來勝竹弧。感得黃婆遺澤在。叢祠簫管走神巫。

木棉出自閩廣。松江民初得其種植之。率用手去棉子。以竹弧置案間。振掉成

劑爲力甚艱。元初有媪名黃道婆者。自崖州來。教以杼彈紡績之具。及錯紗配色。綜績
翠花諸法。力書事倍。民利以興。未幾媪卒。民立祠以享。至今不衰。事見陶宗儀輟耕錄。

戈操同室亦堪哀。疑獄誰稽託卜來。元蒙古字國史甚秘。禁人繙釋。名曰托卜齊延。卻笑龍潛憂患日。尙希高價待青梅。府志。元文宗於至治間徙居瓊

州。時瓊帥陳謙亨有侍女青梅。色藝甚美。文宗屢思得之。而竟不就。因賦詩云。自笑當年志氣豪。手攀銀杏弄金桃。滇南地僻無佳果。聞著青梅價也高。

普明寺鈔不周貧。元史。文宗紀。至順元年正月。賜海南大龍興普明寺鈔萬錠。那改乾甯慶紫宸。文宗紀。天曆二年三月。改潛邸所幸瓊州曰乾甯。福國佑民剛六載。可憐

餘運盡庚申。

絕代紅顏苦捍疆。能拚一死植綱常。野棠落盡春風改。遺蛻誰尋蔡九孃。蔡九孃者。元末瓊州仁政翼黎兵千戶克憲之女。有姿色。通曉書義。年十一。父

歿弟幼。不欲以黎土他屬。遂統父兵以佐弟。齒逾三十不嫁。及元亂。九孃帥師保境。會土賊陳子瑚陷郡。聞九孃美而多智。欲以兵力脅取之。九孃固守不下。日久力竭。泣謝鄉人曰。賊新得郡而來者爲我也。我死則禍息矣。乃僞開壁迎子瑚。而乘間走鋪錦巖。死焉。一說九

孃僞迎子瑚。醉以酒。乘隙走巖中。子瑚怒。以草塞巖口。燒殺之。文昌縣志以醉酒爲副元帥陳乾富事。與府志微異。

綠鬢淒吟寡鵠篇。無瑕心事玉同堅。朱繩三尺渾閒事。那計人誇二女賢。蔡氏二女者。其一九孃。一爲九孃之妹。適同邑王和。早寡。土賊陳子瑚主簿邸

田。欲奪之。不屈。自經死。至今號蔡氏二女。

良宵聽唱妹相思。妹相思。中山歌名。略似苗蠻跳月詞。風景不殊人事改。紡場一賦問誰知。瓊俗。邨落小民家婦女。多於月明中聚織。與男子歌答爲

戲。號曰紡場。洪武末。王文端公直從宦寓瓊。嘗往觀之。因有紡場賦之作。正統間。知府程瑩革其習。成化以後。絕無此風矣。紡場賦。府縣志亦俱不載。

俊語何來割紫雲。將疑將信有斯文。桐鄉自寓升沈感。什襲非關愛古芬。前明王同知佐。號桐鄉。嘗於郡陽得一硯。背有銘曰。誰割紫雲。落我書几。其夾

津津。中含霖雨。曷發其藏。蒼生之喜。以爲陶淵明物。擅藏以示子孫。余謂銘詞不類。晉人語。必質物也。或王公懷士不遇之感。託之古人耳。

漲海盈盈帶濁泥。瓊海恆溢。故曰漲海。炎方消息故難齊。水流似客渾無定。晨見東來夕向西。天下潮汐。消長皆同。惟瓊海兩岸。東西異流。每南岸水流

東而長。則北岸水流西而消。北岸水流東而長。則南岸水流西而消。同此一海。彼順此逆。所謂急水之旁。必有迴流是也。然東流日僅二十四刻。西流則計時有九。又或數日不流。蓋伏流也。說者謂地勢西北高而東南下。瓊雷兩岸相夾。見水長而上。則以爲西流。水消而下。則以爲東流耳。

說詳瓊州府志。
雲露巍巍百丈餘。三潭靈氣澤枯臞。北來過客休相訝。奇石天生橄欖珠。雲露山。在郡城西南六十里中。有三潭。蕭雨輒應。上一潭林木陰森。人不敢近。

其下二潭。產小石如橄欖。有孔可穿。俗名橄欖珠。

六如亭下古梅株

惠州西湖有六如亭東坡拜朝雲處梅花頗盛

四望臺前好畫圖

潮州西湖巖石最佳四望臺爲勝景之一

誰料幽奇探不足瓊州別有小西

湖小西湖在瓊州城西

汗濁焉能混至清一泓如鏡倍光瑩願將鏡井爲身鏡活水源頭盍此情

鏡井在瓊山東山市西北一里許廣三丈深無底水清如鏡翠魚出沒其間井

門通三十六曲溝溝水濁井

水清擘然不混如河清然

異魚能化事恢奇

鯉魚潭有異魚如鯉烹之輒化爲水

北岸流泉應鼓聲

北岸泉在北岸廟前臨常場當廟祭時伐鼓三通泉輒湧溢事已復竭

更有惡溪行不得征人

惆悵說那黎

沙地水卽那黎水色黝而毒涉者多腐裂往來皆以桶渡以上三水並出澄邁那讀如羅

志棄流傳語不經方音譌轉託神靈生黎畢竟如盤瓠那有天邊婺女星

黎母山在定安城西南三百八十里爲黎人祖山志言婺女星常降此故又名

黎婺山不知黎婺卽黎母之轉音非婺女也相傳雷破蛇卵出一女後居

此山誕生黎類遂稱黎母山之命名以此則其事與苗裔相似或不謬耳

羅侯治績著廉平異代猶聞頌政聲試向澄潭占土偶百年安得長官清

清潭在定安城北建江中相傳潭中有土偶五縣令清則沙開成潭土偶可見

食汗則沙淤不見。正德中縣令羅昌有廉聲。巡按御史潘季馴爲作清潭記。

點點飛鳶墮水多。遺將鼓製待摻羅。伐銅聚飲原蠻俗。好事偏矜馬伏波。

銅鼓山在定安城東六十里。山勢雄峻。下有龍神廟。相傳諸獠鑿銅鼓於此。鄉

人發得之。因以名山。一說鼓爲馬伏波征交阯所得。余謂銅鼓本蠻中所有。故流傳極多。大率無年月款識。安得據爲伏波故物耶。通人必不受其蔽矣。萬州亦有銅鼓嶺。

東嶽婦人爛女工。紡車軋山花紅。古邏

黎語稱小帽。黎中聚腰之名。往前縣。黎語縣前曰前縣。

尋个官娘

瓊州方言。稱上戶之男曰官。女曰娘。賣

布籠。

東嶽山在定安城東一百里。其鄉之民如援孫然。嶽婦紡績吉貝布。縷細密。雙白。謂之布籠。

七洲洋中波浪深。鋪前港口檝如林。一從互市集重譯。天險茫茫空古今。

七洲洋在定安縣東大海中。七山連峙。有泉可供樵汲。鋪前港在城西北一百

五十里。水自瓊山來。納三江水入

海。商舶多集於此。爲定安咽喉。

曬鹽那得溫泉好。南田岱山奚足誇。壩澗充盈民氣暇。芋邊閒坐話魚爺。

定安城南三十五里。有溫泉。一名鹽水池。冬夏常溫。水浮草上。曬之成鹽。南田

岱山皆斷地。亦出曬鹽。然無溫泉。功不如此速。魚爺井在定安城

西。水極清。中有巨魚。頭白。俗呼魚爺。芋者野農所種。以避火也。

屹立峯前氣象雄。五丁欲挽竟無功。誰知宛轉隨封伯。大有脂韋俗士風。

多異嶺。在會同東南二十里。中多奇石。有一石如卵形。闊可丈許。下有盤石盛

之人不能移。風吹之

則動。因名風動石。

奇聞竟有石吞人。俎豆千年迹未湮。今日征黎勞將士。驅蜂會否賴山神。

臨高縣西北十里。有崑耶山。東漢建武二年。邨民王祈偕伴入山。憩石上。爲石

所吞。挽之不出。祈忽作聲曰。我爲崑耶天神。隱此石室。此後可以純白三牲祀我。言訖。遂全沒石中。不復見。宋靖康間。黎叛。攻臨高。吏弗能禦。禱於神。須臾。蜂蠶徧空。遂賊螫之。賊大敗潰。見元范稗記。至元元年正月。敕封顯應侯。

一峯高聳是羅盆。五指遙連瘴霧昏。我笑澹菴愁尙淺。南來猶怯買愁邨。

買愁邨。在臨高城南三十里。羅盆嶺下。宋胡銓謫崖州過此。有句云。北往常思

聞喜縣南來

怕入買愁邨。

儋耳城西有相泉。乳泉坡井亦清漣。前蘇後趙來非偶。天爲炎荒謫兩賢。

相泉。在儋州西十五里。宋丞相趙鼎謫吉陽軍過此。遇旱渴甚。鑿井得泉。知軍

事方汝運。作亭於上。榜曰明

秀。乳泉坡井均以東坡得名。

古有望夫人化石。弟兄化石又茲鄉。緯蕭事業能拋卻。獨惜山中橘柚香。

峻靈山。在昌化城西北十里。舊名神山。高百餘丈。上有二石如人形。相傳有兄

弟向海捕魚。化爲石。又有石若冠帽。乃其所遺。及所築石船。皆在旁。有橘甚甘香。可就食。不可持去。持去卽暴風黑霧駭人。其石池中所產紫鱗魚亦然。東坡有峻靈廟。記述其事。

甘藷紅白可爲糧。不羨神仙辟穀方。配以東坡新玉糝。傲他南國舊椰霜。

瓊人多以甘藷爲糧。有紅白二種。又以南椰粉爲飯。名椰霜飯。色味類藕蕪粉。

與椰子樹不同。玉糝羹。見東坡集中。瓊人亦以芋充食也。

閒尋香草證離騷。翡翠文珠豔影韜。誰向豪門矜報喜。花花葉葉總忘勞。

海南蘭族之奇者。有翡翠、文珠、雞爪、鹿角、鶴頂諸名。江南人多未知之。一種如

臘梅而色紅紫。每莖作七八枝。遇吉事則開。名報喜蘭。

花梨龍骨與香柑。良賈工操術四三。爭似海中求飲木。茶禪如向趙州參。

花梨龍骨、香柑皆海南木之珍者。飲木生珠崖海中。其地有渚東西五百里。南

北千里。無水泉。渴者伐此木以盤盞承其汁飲之。亦奇種也。

海南奇香不可得。得者金絲與虎斑。耳食紛紛探幽險。譬如空入寶山還。

奇柑香在黎人境中。上者爲生結。次爲糖結。俱不易得。其稱虎斑結金絲結者。

最下品也。或有緹幽鑿險。并下品亦不得者。

老去方求種樹書。藹車辟蠹最宜儲。新栽睡草須頻喝。好趁羲皇一枕餘。

政和本草。藹車。出海南山谷。諸樹木蟲。蛀者。顯此香。俟冷淋之。即辟也。澄邁縣。

志。喝睡草。聞人喝聲。葉則盡僵。述異記。睡草出海南。見之則令人睡。一名醉草。亦呼懶婦蕒。

北戶遺言尙可憑。都休野鹿異名徵。書囊合子都如舊。第一難求作筋籐。

唐段公路北戶錄。瓊州五色藤。合子書囊之類。細於錦綺。府志。都休藤。能解毒。

藥。野鹿藤。可制纜。編以為幕。作花藥魚鳥諸文。又一種名金藤。可以為筋。遇毒物則煙氣迸出。不易得也。

頻占木客候潮雞。金了文鸚兩處棲。惟有青雛常倒立。檳榔枝上盡情噦。

五色雀。一名木客。早見則雨。潦則反是。見東坡集。石雞形特小。一名潮雞。潮長。

則鳴。李德裕詩。三更津吏報潮雞是也。秦吉了有三種。俱產瓊州。眼黃者為金了。最貴。白為銀了。次之。黑為鐵了。又次之。青雛。生於檳榔林者。謂之檳榔雛。喜食檳榔之未熟者。宿則倒懸。一足於樹杪云。

山牛山馬自成羣。猿小如拳亦異聞。除卻謔謔驚腹鼠。不知何物是山君。

瓊地無虎。而有山牛山馬。山牛與常牛無異。但眼赤耳。行則結隊。見人亦不甚。

避。山馬似鹿而大。角彎內向無歧。目下復有二目。晝眠夜張。其皮可為鼠具。禦溼。毛色與山牛無別。腹鼠尾大似松鼠。出則懼有火災。猿類極多。小者名石猴。拳許大。飲之以水即長。亦名黑猴。今頗難得。

機杼纒懸去莫留。个中物理費推求。近來執卷多思睡。莫是曾然懶婦油。

懶婦魚。產瓊南谿澗中。似豪豬而小。好食禾黍。制之者。但以織具懸田廐間。則。

望而卻走其油爲燭以之飲酒則紫醪生
花以之讀書則昏無所見見鄭氏赤雅

生魚倒挂不可食食之昏昏多醉容

倒挂魚出萬州生食醉人但宜爲醉

何當覓取鵝毛脰蜀醬閒徵郭義恭

北戶錄廣之恩州出鵝毛脰其細如毛用

鹽藏之味絕美郭義恭所謂武陽小魚大如針一斤千頭蜀人以爲醬是也今瓊州志載此品謂鵝毛脰卽鱖魚之俗名予按唐代海南無恩州北戶錄所云恩州乃今陽江地舊志引之非切證矣

聞道神龜有六眸明珠大貝比琳璆爭如石井能占雨不向重溟阻客舟

宋史太宗紀淳化四年十一月萬安州獻六眸龜萬安卽今萬州也府志引南

越志土產明珠大貝大貝卽紫貝瓊南有之又云文昌縣北石井中有紅白二龜遇旱禱之紅出則雨白出則否又海中有封龜如島洋舶長之其龜小者亦重二三百斤

石蟹茲夷盡異材瓊崖海物勝廉雷三台峯頂看明月與子同傾鸚鵡杯

石蟹生崖州榆林港潛深穴中本動物也捕者攜出水卽化爲石蟻蟻俗名茲

夷龜之巨者背可負人而行三台峯在府學宮後鸚鵡螺出清瀾海狀如覆杯首向腹似鸚鵡土人取以爲鸚鵡杯

太沖辭賦壯山川鄉貢宜徵八繭絲從古蠶桑屬吳越珠崖曾置赤烏年

瓊蠶一歲八登左思吳都賦國稅再熟之稻鄉貢八繭之絲蓋孫吳奄有交州

赤烏五年曾復置珠崖郡屬之則瓊亦吳地矣

商略園林點綴加。水晶如玉絕無瑕。嫌他尙隔生苞境。更向文昌拾海花。

瓊州水晶有高至丈餘者。然在生苞境中。頗不易取。文昌縣有海花石。可爲假

山生苞。卽生苞也。伍乃

本字。類篇云。粵中穠種。

纏機成器漆成文。黎錦光輝豔若雲。偏是賢蹤容易沫。東城墨法久無聞。

纏機。雕漆諸器。俱有可觀。黎錦。黎幃。均出自黎人。製甚美。若東坡在儋日。令潘

谷造墨。銘曰。海南松煤。東坡

法墨者。今其製久不傳矣。

儋耳城南故址存。將梁平越此畱屯。

漢儋耳郡城。在今儋州城南。將梁。侯楊僕所築。

樓船一棄無回顧。想見爭先奪石門。

漢書楊僕傳。武帝稱僕功。獨有

先破石門。尋陋。今文昌縣城西一百五十里。有焚燒山。近海岸。周圍三里。相傳楊僕征黎至此。焚船登岸。故名。殆旣破石門後。自番禺渡海。鼓其餘勇。爲萬死不顧一生計耶。

雙泉洄酌誦坡詩。八百年來尙在斯。我向荒亭尋往迹。檳榔花發滿叢祠。

東坡於瓊州城東北隅得雙泉。太守陸公建亭其上。東坡名之曰洄酌。今亭在

東坡祠前。金

粟泉之右。

寥落孤忠付夕暉。臣心戀闕尙依依。如今瘴海頻來往。不用雲端羨鳥飛。

李德裕崖州望闕亭詩云。獨上江亭望帝京。鳥飛猶用半年程。青山也恐人歸

去百匝千遭繞郡城。今自泰西互市。
番舶往來瞬息千里。不啻戶牖間矣。

水向石邊流出冷。風從花裏過來香。一臺興廢關何事。懷古情深未可忘。

東坡臺在郡城東南。東坡嘗寄此。鑿一泉於臺側。水向二語。其自題臺柱句也。

爲愛公餘結古歡。水流花放一憑欄。橋亭圯盡芙蓉死。信有人間供張難。

宋時郡學門外有麗澤亭。時水中飛橋徑渡。四面環植木芙蓉。最爲勝概。後以

守帥游燕。頗數校官。

苦於應接。遂廢不治。

炎服憑誰衛翰屏。勝朝柔遠已無亭。可憐竭蹶支強國。大海茫茫寄一萍。

郡城北五里官道。舊有柔遠亭。爲明天順間暹羅國使臣黃坤普倫所立。今已

久廢。暹羅屬地。近亦爲泰西各國。

蠶食過半。子然孤峙。甚可危也。

石室藏書久渺然。桐墩精舍亦虛傳。千秋文學終須振。誰似邱陳一輩賢。

明邱文莊潛藏書石室。陳賁生文徵桐墩書舍。皆著書若干卷。以餉後人。今俱

不可得

聞矣。

一坏空土重遺芬。歸骨分明史有文。絕似豫章還葬後。路人猶說太真墳。

宋史趙鼎傳。載鼎身後歸葬事甚悉。今昌化縣乃有趙鼎墓。蓋當日馮葬之所。

亦如江西南昌
之有溫嶠墓耳。

三十六墳何處來。云何獨愛此山隈。八公幻迹偏多事。苦戀人間土一堆。

三十六墳在感恩縣東北四十里。相傳與飛來廟同日飛至。散處荒郊間。皆有

扁題符八公姓氏。今墳及石碑俱在。

窮海熬波本自資。何須重疊設官司。聖朝恩德除加派。莫忘乾隆全盛時。

瓊地四面環海。所產鹽皆自煎自賣。以給遠近。宋以前官無定額。自元豐增設

提舉等官。亟行重斂。而民始困。明初雖盡蠲雜派。天順後浸以加增。迄於明亡。莫之能革。我朝罷提舉。不設聽民自售。以其課歸府州縣官經理。盡除前代諸敝政。至乾隆時。而民氣熙熙。家給人足矣。

宋代苛征在買香。

海南買香。官吏科派香戶。見李燾續通鑑長編。

有明言利析毫芒。

明制瓊州稅款。凡十有四萬曆以後。科斂益煩。

海民幸沐唐虞澤。鑿井耕田帝

力忘。

前代批政。我朝蠲革殆盡。至乾隆十一年。復永免瓊州所屬牛薪無著之稅。

濱海沙礁不可行。瓊南奇險本難爭。鄉軍況更宜風土。禦侮何煩召客兵。

瓊州西路多沙。東路多暗礁。舟行最為艱險。濱海民風悍直。驅使得宜。足資

戰守。第恐客土不和。文武競勢。則變不自外生耳。

孫恩設計未全非。不學弦高犒乘韋。猶有中朝雄武氣。夷船能破佛郎機。

明嘉靖四十三年五月。佛郎機夷。以三艘泊鋪前港。海賊施和率衆攻之。毀其

船桅。佛郎機敗遁。

殺賊狂呼氣若神。屠沽事業健兒身。此君宰肉原非鄙。鄙者還推肉食人。

隆慶初。海寇猖獗。四擾。副使某公畏賊不敢出。二年五月。賊迫澄邁。某公不知

所爲。時賊先入城者七人。有屠者升屋大呼曰。快殺賊。賊大驚疑。不可測。遂遁去。城賴以全。

環海兵戈四十年。燎原未息蔓恆延。老謀最服胡襄懋。片語能操勝算全。

自嘉靖迄萬曆。海賊迭衰迭旺。瓊屬被擾者四十年。善乎胡總督宗憲之言曰。

謂之海防者。必防之於海。猶江防必防之於江。因有哨賊遠洋。擊賊內洋之議。斯真能得要領者。

三口嵯峨倚礮臺。三口者。海口爲瓊那咽喉。鋪前。馬鼻二港。其肘腋也。戎機萬變慎奇孩。輸攻墨守難言說。運用終歸頗牧材。

譚海防者。無不以口岸礮

臺爲最要。余謂礮臺如堦堦然。使無奇兵。從臺外以襲擊攻臺之兵。而惟株守以受敵礮。臺卽甚固。持至數日。未有不爲敵所摧者。又況敵人潛師登岸。左右襲攻。則礮臺更不能堅守耶。臺失而臺以後之人心。動搖不可復定。是土崩瓦解之勢也。故善守者不專恃臺。而在於臺之前後左右。皆布活著。神而明之。存乎其人矣。

寸絲尺縷皆民力，廣幅如何亟擾民。覆轍古今原一例，漫言人不識尊親。

漢武帝末年會稽孫幸爲珠崖太守，調廣幅布獻之，幸不堪役，遂攻郡殺幸。

子豹討擊始平，按廣幅布者，謂所獻之布。

視常幅而廣之也。事見後漢書南蠻傳。

官貪珍賂能遺患，民習雕題總少文。兩事殷勤相誠語，漢家循吏首僮君。

漢明帝時丹陽僮尹自儋耳太守，擢交趾刺史，遷至珠崖，戒敕官吏毋貪珍賂。

勸諭其民，毋鑊面頰，以自別於峒俚，由是民俗日變，漢海南循吏無過僮者。

能涉波濤仗一誠，王丞風義足平生。素車白馬情何極，突過當年范巨卿。

唐王義方，貶儋州吉安丞，行至海南時，當盛夏，風濤蒸毒，義方爲文以祭海神。

天忽開霽，貞觀二十三年，改洄水丞。時張亮兄子皎流崖州，依義方而卒。臨終託以妻子，及致屍還鄉，義方許之，以皎妻少，故與之誓於神，使奴負棺輟馬載皎妻，身步從之。既葬，皎原武歸妻其家，而告亮墓，乃去洄水。

膏膳豐盈教有資，五經爛熟可爲師。瞽宗若仿先儒例，惟祀還應奉守之。

慶曆間，宋守之知瓊州事，教諸生讀五經於先聖廟，建尊儒閣，暇日親爲講授。

置學田以資膏火，由是州人始知好學。

是州人始知好學。

民尊長吏吏親民，上下相孚教可神。況是海疆遼遠地，豈宜高坐厭吟呻。

紹興二年，知瓊州虞沈以瓊隔海洋，民瘼鮮得上達，吏無顧忌，民苦侵流，乃請

不禁越訴。仍敕監司按治。重其責。罰數年之間。積弊頓革。民困獲蘇。

緡錢已免。苦葶茶。婦役還蜀。吉貝花。嶺海便民疏十事。尙畱餘憾。動咨嗟。

宋崔清獻與之。爲廣西提點刑獄。浮海巡珠崖。首緡苦葶茶。征及婦人織役。又

疏積弊十事。申諭而痛懲之。具詳宋史本傳。高惟肖嘗刻之。號嶺海便民榜。與之以熙甯免役法。獨不及海外四州。民破家相望。議舉行未果。深以爲憾。嘗以語顏戮。戮後於嘉定中守瓊州。遂行之。

天水淒涼勢莫支。壺漿箠食盡迎師。趙張一死存瓊島。撐住河山破碎時。

景炎祥興之際。宋事已去。守土吏望風降潰。獨瓊州安撫使趙與珞。張應科誓

死不屈。張攻雷州戰歿。趙城破被執。抗節死之。自是天下守臣。無復有拒敵者矣。

奄侍聊堪供掃除。中官出鎮意何如。孝宗朝政猶嚴肅。尙有貂璫病里閭。

明代中官之害。不可勝言。宏治中。廣東鎮守太監上言。各堡俘獲幼男。宜從宮

刑。給內用。而實無其人。比詔取之。則買良人子。腐以充數。斃者且半。不足。又買之海南。巡按御史劉纓聞之。急渡海按驗。審非俘獲。卽日散遣五百人。五百人之家。皆曰公實生我。後有子。當從劉姓。以報嗚呼。宏治英主。其時璫害尙如此。何論漢唐季世乎。

問馬知羊真健吏。引經決獄是通儒。尋常事物能推究。爲吏應須善讀書。

正德間。閩縣曹梅。知樂會縣。善折獄。時有主兵者所乘馬。夜忽被殺。使梅察之。

曰。是必與圍人仇者。乃令同帳諸卒。悉出佩刀。煨以火而熟視之。忽指一人曰。殺馬者汝也。其人驚懼。遂歎服。或問其故。曰。金史載有盜殺馬者。李復亨謂刀蟻馬血。火煨之。則刀色青。余適憶之。而師其法耳。

異俗年年苦橫征。能清吏治卽銷兵。何須別撰平黎策。黃石遺書遜此精。

正德末海南副使胡訓平黎有功嘗謂黎人之劫殺皆由土舍之科斂土舍之

科斂皆由有司之貪墨宜端本澄源則不令自清矣斯言也雖前代之陳言實古今之龜鑑

守義拘文吏有權積衰難返是遷延。一聲鼓罷庭花落。記取彭公蒞政年。

府志言嘉靖間彭希顏宰昌化嘗曰民有急必履具而後理則奸究聞風伏矣

乃置鼓於門使訟者鳴之卽坐堂皇判決是非立斷聽者加坐以鳴鼓之刑有樞者入山探薪其子以氣忿殺人比暮歸獄已具申解就道矣其治事敏速如此吏何所容手哉

章曾燄熾終危宋司馬名高并及蘇海上生還任給事彼蒼原未殺無辜。

眉山任忠敏伯爾徽宗初力攻章惇去之繼欲劾曾布爲布所覺貶外崇甯黨

事作則籍編管昌化時伯兩仲子被逮妻又死於淮伯兩處之如平常曰死者已矣生者有責於朝廷亦當從此訣不然天豈殺無辜耶居海上三年而歸宣和初卒年七十有三

未能戰守豈能和。欲振頽風奈弱何。讀到李胡危切語。宋家青史淚痕多。

紹興間李莊簡光胡忠簡銓並以力權和議先後謫昌化吉陽兩軍皆頽死幸

存李後召還至江州卒胡於李宗朝寵遇甚至然亦不能申其志今海南所傳二公遺述甚多

靖難師興託輔成。淫刑流毒及童嬰。瞿能孫岳皆奇士。不爲君親惜此生。

瞿能孫岳皆建文時人能官左都督與燕王戰白溝河力竭死岳以都督守鳳

能孫宏宏子連孫兄子綱信及岳均安置海南閒住

憔悴孤臣蹈海情，鸞書心事負平生。酒闌一掬滄桑淚，同志應偕鐵仲名。

梁良玉，定海人，建文時中書舍人，遜國後，變姓名走海南，鬻書以老，仲名，鐵參

政鉉之父，鉉就義時，仲名年八十三，與妻薛並安置海南，見明史鐵鉉傳。

多事俳諧一集陳，瓠盧漢學失斯人。官家自信司晨譜，遷怒何緣及侍臣。

舊唐書劉納言傳，精漢書，學為當時宗匠，乾封中以漢書授沛王賢，及賢為皇

太子，累遷太子洗馬，兼侍讀，嘗撰俳諧集十五卷，以進太子，及東宮廢，高宗見而怒之，詔除名，後又坐事配流振州而死，振州，即今崖州也。

玉局風流樹一軍，瓣香祇向父書薰。平生快讀斜川集，家學淵源重此文。

東坡謫海南，子過侍往，凡生理晝夜寒暑所須者，皆過一身任之，蘇子由每稱

其孝，以訓宗族，且言吾兄遠居海上，惟成就此兒能文也，今斜川集有重刊真宋本。

是誰健筆破天荒，始信東坡眼力長。

用樂城集句

欲訪荒墳薦秋菊，亂山零落祇斜陽。

瓊州宋以前無舉進士者，舉進士自瓊山姜唐佐始，唐佐，字君

翽，從東坡遊，東坡愛之，贈以句云：滄海何嘗斷地脈，白袍端合破天荒。且曰：子異日登科，當為子成此篇。及崇寧二年，隨計過汝陽，東坡已歿，子由因賦七律足成之，府縣志皆不載，唐佐墓所在，知其亡失久矣。

士族中州著籍尊。豐公苗裔晉公孫。故應舊俗於流品。羞向寒門說宦婚。

海南多中州士族。徙居。府志稱。裴度十四世孫。孫知吉。陽軍。遂居吉陽。趙丞相

鼎後裔。亦有留吉陽者。至今瓊俗最重門第。或本中州之故習歟。

學宗濂洛。埭門牆。衍義書成足補亡。我愛巡鹽邢御史。惜無佳傳媿文莊。

明邱文莊。湛深理學。所著大學衍義補。實視真氏原書爲有實用。文昌邢僉都

宥。歷仕內外。治績稱最。而府志列傳。轉不及文莊之詳。殆以官闕有等差耳。

太學殷憂存發冢。桐鄉偉略在平戎。窮通壽夭皆休論。似此文章已足雄。

邱敦。字一成。文莊長子。宏治初。以太學生留京邸。見閣宦李廣。將復成化故

事。心竊憂之。乃著發冢論。以見意。年僅三十一而卒。臨高王佐。字汝學。博學多識。成化初。任高州府同知。時鄧御史韓雍。用兵兩廣。佐獻平戎策。動中肯綮。雍頗奇其才。後歷三郡。僊蹇。仍以同知致仕。本年八十五。

強直何會計。有私閻羅包老世。皆知遠猷最數平。黎議絕勝輿棺進諫時。

海忠介官戶部時。直諫一疏。天下傳誦。然忠介平黎策中。謂堅持開十字道之

心。固執立州縣之計。乃爲上策。餘皆苟安一時而已。斯言尤關瓊郡千百年之利病也。

忠義何分壤與霄。麗珠而後又田昭。斯民未必無知識。但有龔黃即可招。

黎人自宋王氏仍世効忠。煇燿史冊。至元則有萬州崗首王麗珠。躬率義兵。平

陳子胡之亂明又有儋州七方崗首符田昭以力捍海寇陣亡志乘班班可考是固非甘居化外者

蹤迹依稀似隱淪兩黎寂寞老符貧遐方風氣多真樸不似中原尙要津

黎子雲兄弟及老符秀才均見東坡詩

釋老名篇自魏收圖經依樣類俳優始終不解徐元直何事幽棲在此州

自魏書有釋老志郡國圖經類登仙釋一門誕妄離奇千帙如一瓊州府志載

康熙三十五年三國徐庶在

五指山飛昇事尤可異也

顏氏閑家枉費詞

顏氏家訓正家篇以妻死有子已復再娶爲戒

世間後母竟能慈故應歎絕劉中壘特志珠崖二女師

漢女初孀者珠崖令前妻所生

女也年十三令卒妻女還漢法攜珠入關者死初孀之繼母有珠已棄之其弟九歲拾而置諸匱母與女皆不知也關吏索得珠曰誰當坐者女意母所置亟自承曰母解棄妾惜而置之母不知也妾當坐母爭曰是珠妾所愛妾不忍棄當坐妾女何與焉皆痛哭失聲哀動行路吏亦垂涕曰皆若此其何罪之有已而知九歲子所爲遂釋之事見劉向列女傳

娑竭羅邊叩淨因

娑竭羅出大方廣佛華嚴經華言海也

設支難滅此根塵

梵言設支此云能縛謂女人若可愛能生男子染著通名設支見阿毗達磨順正理論

近來梵嫂都成

例那有天花不著身

海南僧皆有室家元撒迪至瓊州見之意甚不憚曰何物蠻菩薩無一人天花不著身也今則相沿成習矣

嶺南無地無炎瘴。海外由來瘴更深。莫羨山林厭城市。須知城市勝山林。

海南炎瘴最重。渡海者恆畏之。然郡城風土與他郡亦不甚異。惟深山密箐中。

及陵水崖州諸屬。則瘴氣甚厚。以人煙較稀。且距黎山近也。

溼雲如墨霧重重。卻疾先宜制毒龍。自有檳榔供薄醉。如何偏嗜阿芙蓉。

禪家有制毒龍法。謂過欲也。

晨飲微醺。飯後食檳榔二三枚。均可辟瘴。自阿

芙蓉膏盛行。人多以此為珍饈矣。

大海西流近越裳。黍油麥秀事堪傷。唇亡自是驚心語。說與馮夷也斷腸。

越南在瓊州正西。東至海三百二十里。與儋州昌化相直。自萬州東南七洲洋。

取咕嚕羅山而至廣南。廣南古占城真臘二國地。越南之西京也。由七洲洋西。繞北而進。可達交趾。越南之東京也。越南南境臨海郡會。曰東埔寮者。真臘之故都。今名嘉定省云。

攘外端由內已安。整軍經武莫辭難。三州十縣環雄島。好作南陔砥柱看。山海雄深氣所鍾。應多奇俊衛提封。摛巖採幹從今始。早植峨峨百尺松。考獻徵文故紙堆。詎為方志作重儔。百篇敢詡能持擇。或有微言待翦裁。